

武昌醫館叢書

三二



仲景傷寒補亡論卷第十

禁書目錄 河自南 郭云雍小誤中次

不可下四十七條 不可下四十八條

不可下四十七條

仲景曰脈濡而弱弱反在關

龐云關下三分也

濡反在巔

關上

三分也

微反在上

寸脈也

濇反在下

尺部也

微則陽氣不足

濇則無血陽氣反微中風汗出而反躁煩濇則無血

厥而且寒陽微不可下下之則心下痞鞭龐氏以氣

血俱不足用小建中湯常氏云下後心下痞鞭用增



損理中丸

又曰動氣在右不可下下之則津液內竭咽燥鼻乾
頭眩心悸也龐氏以咽燥鼻乾宜竹葉湯

又曰動氣在左不可下下之則腹內拘急食不下動
氣更劇雖有身熱臥則欲蹠龐常皆云先服乾薑甘
草湯後服小建中湯

又曰動氣在上不可下下之則掌握熱煩身上浮冷
熱汗自瀉欲得水自灌常氏云宜小建中湯

又曰動氣在下不可下下之則腹脹滿卒起頭眩食



則下清穀心下痞也龐氏云心下痞宜半夏瀉心湯
又曰咽中閉塞不可下下之則上輕下重水漿不下
臥則欲蹠身急痛下利日數十行常氏云咽中閉塞
可烏扇煎下利宜四逆散

又曰諸外實者不可下下之則發微熱亡脈厥者當
臍握熱雍曰宜服去白朮理中湯以朮利腰臍閒血
故也

又曰諸虛者不可下下之則大渴求一作水者易愈
惡水者劇雍曰宜小建中湯



又曰脈濡而弱弱反在關濡反在巔弦反在上微反
在下弦爲陽運微爲陰寒上實下虛意欲得溫微弦
爲虛虛者不可下也微則爲欬欬則吐涎下之則欬
止而利因不休利不休則胸中如蟲齧粥入則出小
便不利兩脇拘急喘息爲難頸背相引臂則不仁極
寒反汗出身冷若冰眼睛不慧語言不休而穀氣多
入此名除中消一云口雖欲言舌不得前雍曰此不治
之證故諸家無治法龐氏云諸脈濡弱微虛細相搏
俱不可下



又曰脈濡而弱弱反在關濡反在巔浮反在上數反在下浮爲陽虛數爲亡血浮爲虛數爲熱浮爲虛自汗出而惡寒數爲痛振寒而慄微弱在關胸下爲急喘汗而不得呼吸呼吸之中痛在於脇振寒相搏形如瘧狀醫反下之故令脈數發熱狂走見鬼心下爲痞小便淋瀝小腹甚鞭小便則尿血也常氏云可小柴胡湯鵲石散延胡索散

又曰脈濡而緊濡則衛氣微緊則榮中寒陽微衛中風發熱而惡寒榮緊胃氣冷微嘔心內煩醫爲有大

熱解肌而發汗亡陽虛煩躁心下苦痞堅表裏俱虛
竭卒起而頭眩客熱在皮膚悵快不得眠不知胃氣
冷緊寒在關元技巧無所施汲水灌其身客熱應時
罷慄慄而振寒重被而覆之汗出而冒巔體惕而又
振小便爲微難寒氣因水發清穀不容間嘔變反腸
出顛倒不得安手足爲微逆身冷而內煩遲欲從後
救安可復追還常氏云可灸關元雍曰仍服通脈四
逆湯

又曰脈浮而大浮爲氣實大爲血虛血虛爲無陰孤



陽獨下陰部者小便當赤而難胞中當虛今反小便
利而大汗出法應衛家當微今反更實津液四射榮
竭血盡乾煩而不得眠血薄肉消而成暴液暴液一作黑液
醫復以毒藥攻其胃此爲重虛客陽去有期必下如
污泥而死常氏云可小建中湯已經下者不治

又曰脈浮而緊浮則爲風緊則爲寒風則傷衛寒則
傷榮榮衛俱病骨節煩疼當發其汗而不可下也常
氏云可桂枝麻黃各半湯雍曰仲景可汗證中只用

麻黃湯



又曰跌陽脈遲而緩胃氣如經也跌陽脈浮而數浮則傷胃數則動脾此非本病醫特下之所爲也榮衛內陷其數先微脈反但浮其人必大便鞭氣噫而除何以言之本以數脈動脾其數先微故知脾氣不治大便鞭氣噫而除今脈反浮其數改微邪氣獨留心中則飢邪熱不殺穀潮熱發渴數脈當遲緩脈因前後度數如法病者則飢數脈不時則生惡瘡也常氏云可小柴胡湯惡瘡漏蘆湯

又曰脈數者久數不止止則邪結正氣不能復正氣

卻結於藏故邪氣浮之與皮毛相得脈數者不可下之必煩利不止常氏云可柴胡桂枝湯

又曰少陰病脈浮不可發汗亡陽故也陽已虛尺脈弱濇者復不可下之雍曰宜建中湯

又曰脈浮大應發汗醫反下之此爲大逆雍曰誤下宜四味理中丸誤下則中氣受傷故用是湯

又曰脈浮而大心下反鞭有熱屬藏者攻之不令發汗屬府者不令洩數洩數則大便鞭汗多則熱愈汗少則便難脈遲尙未可攻常氏云可小柴胡湯雍曰



此一證中有誤字脈經云攻之不令微汗屬府洩數則堅汗多則愈汗出小便難文皆有誤不能通

又曰二陽併病太陽初得病時發其汗汗先出不徹因轉屬陽明續自微汗出不惡寒若太陽證不罷者不可下下之爲逆常氏以太陽證不罷宜柴胡桂枝湯

又曰結胸證脈浮大者不可下下之則死常氏云可小陷胸湯增損理中丸聖餅灸法

又曰太陽與陽明合病喘而胸滿者不可下常氏云



可麻黃杏子甘草石膏湯

又曰太陽與少陽併病心下鞭頸項強而眩者不可下常氏云可小柴胡湯雍曰仲景刺大椎肺俞肝俞見太陽證中

又曰諸四逆厥者不可下之虛家亦然常氏云可當歸四逆湯龐氏云若下證悉見四逆者是失下後氣血不通使然但手足微厥掌心常溫時復指稍溫即可下之勿拘忌也

又曰病欲吐者不可下常氏云可半夏加橘皮湯



又曰太陽病有外證未解不可下下之爲逆常氏云
可桂枝麻黃各半湯雍曰依可汗證中用桂枝二麻
黃一湯

又曰病發於陽而反下之熱入因作結胸病發於陰

而反下之

一作汗之官本及脈經皆作下之

因作痞常氏云結胸可

大陷胸湯痞可半夏瀉心湯

又曰病脈浮而緊而復下之緊反入裏則作痞常氏

云可小陷胸湯瀉心湯雍曰宜半夏瀉心湯

又曰夫病陽多者熱下之則鞭常氏云可小柴胡湯



又曰其人本虛攻其熱必噦雍曰宜半夏生薑湯類
要四味橘皮湯

又曰無陽陰强大便鞭者下之必清穀腹滿常氏云
可蜜煎導之

又曰太陰之爲病腹滿而吐食不下自利益甚時腹
自痛若下之必胸下結鞭常氏云可桂枝加芍藥湯
胸下結鞭者增損理中丸

又曰厥陰之爲病消渴氣上撞心中疼熱飢不欲
食食則吐衄下之利不止常氏云下之利不止宜四



逆湯餘見厥陰本證

又曰少陰病飲食入口則吐心中溫溫欲吐始得之
手足寒脈弦遲者此胸中實不可下也常氏云飲食
入口則吐可瓜蒂散餘見少陰本證

又曰傷寒五六日不結胸腹濡脈虛復厥者不可下
此亡血下之死常氏云可小建中湯已下不治

又曰傷寒發熱頭痛微汗出發汗則不識人熏之則
喘不得小便下之則短氣小便難頭痛背強加溫鍼
則衄常氏云可小柴胡湯已汗者桂枝加附子湯汗

出而喘者麻黃甘草杏子石膏湯已下者五苓散加
溫鍼者芍藥地黃湯

又曰傷寒脈陰陽俱緊惡寒發熱則脈欲厥厥者脈
初來大漸漸小更來漸大是其候也如此者惡寒甚
者翕翕汗出喉中痛若熱多者目赤脈多睛不慧醫
復發之咽中則傷若復下之則兩目閉寒多便清穀
熱多便膿血若熏之則身發黃若熨之則咽燥若小
便利者可救之若小便難者爲危殆常氏云初證宜
桂枝麻黃各半湯喉中痛桔梗湯熱多小柴胡湯便



清穀理中丸便膿血桃花湯身發黃茵陳蒿湯小便
難者豬苓湯

又曰傷寒發熱口中勃勃氣出頭痛目黃衄不可制
貪水者必嘔惡水者厥若下之咽中生瘡假令手足
溫者必下重便膿血頭痛目黃者若下之則兩目閉
貪水者若下之其脈必厥其聲嚶咽喉塞若發汗則
戰慄陰陽俱虛惡水者若下之則裏冷不嗜食大便
完穀出若發汗則口中傷舌上白胎煩躁脈數實不
大便六七日後必便血若發汗則小便自利也常比



曰若熱衄不可制者芍藥地黃湯水逆者五苓散便
膿血桃花湯咽中生瘡白礬甘草散陰陽俱虛小建
中湯裏冷不嗜食理中湯發熱身黃梔子檄皮湯餘
證小柴胡湯汗出小便數甘草乾薑湯

又曰得病二三日脈弱無太陽柴胡證煩躁心下鞭
至四五日雖能食以小承氣湯少少和之令小安至
六日與大承氣一升若不大便六七日小便少者雖
不能食但初頭鞭後必溏未定成鞭攻之必溏須小
便利尿定鞭乃可攻之龐氏曰尺下弱小便不利或



尚少皆未可攻

又曰藏結無陽證不往來寒熱或寒而不熱其人反靜舌上胎滑者不可攻也常氏云可刺關元穴在臍下又曰可刺大赫在腹部第二行雍曰灸尤奇

又曰傷寒嘔多雖有陽明證不可攻之雍曰不可攻之恐厥逆也可小半夏加茯苓湯生薑橘皮湯

又曰陽明病潮熱大便微鞭者可與大承氣湯不鞭者不可與之若不大便六七日恐有燥屎欲知之法少與小承氣湯湯入腹中轉失氣者此有燥屎也乃



可攻之若不轉失氣者此但初頭鞭後必澹不可攻之攻之必脹滿不能食也欲飲水者與水則噦其後發熱者大便復鞭而少宜小承氣湯和之不轉失氣者慎不可攻也

又曰傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也屬甘草瀉心湯

又曰下利脈大或浮大者虛也以強下之故也設脈



浮革因爾腸鳴屬當歸四逆湯

又曰陽明病面合色赤不可攻之攻之必發熱色黃小便不利也常氏云可五苓散

又曰陽明病心下鞭滿者不可攻之攻之利遂不止者死利止者愈常氏云心下鞭滿者可半夏瀉心湯已攻而利者四逆湯

又曰陽明病自汗出若發汗小便自利者此爲津液內竭雖鞭不可攻之當須自欲大便宜蜜導而通之若土瓜根及豬膽汁皆可爲導



龐氏曰不當下而強下之令人腸胃洞瀉不禁而死

仲景曰大法秋宜下

又曰凡服下藥宜用湯勝丸散中病便止不必盡劑

也

又曰陽明病發熱汗多者急下之宜大柴胡湯龐氏

云發熱不惡寒汗多

又曰少陰病得之二三日口燥咽乾者急下之宜大

承氣湯



又曰陽明少陽合病必下利其脈不負者順也負者失也互相剋賊名爲負也龐氏曰陽明土其脈大小陽木其脈弦若合病土被木賊加之以利則胃已困矣若脈不弦爲土不負弦者爲土負必死雍曰此合病一證下至名爲負也而終按本論原誤錄宿食一證相連非也脈經以宿食別作一證爲當蓋脈滑數有宿食故仲景可用承氣湯若胃爲木剋因而下利安有用承氣之理今依脈經離而爲二宿食證依仲景用承氣湯惟合病下利闕治法今以負爲不治不



負宜理中丸厥者宜四逆湯仍瀉邱虛陽陵泉補三里穴龐朱二氏依舊本合爲一證疑其非大抵讀仲景論仍須以脈經參校之

又曰少陰病下利清水色純青心下必痛口乾燥者可下之宜大柴胡湯大承氣湯餘見少陰本證更詳之

又曰下利三部脈皆平按之心下鞭者急下之宜大承氣湯龐氏曰凡脈沈細數爲熱在裏又兼腹滿咽乾或口燥舌乾而渴者或六七日不大便小便自如



或目中瞳子不明無外證者或汗後脈沈實者或下
利三部脈皆平按之心下堅者或連發汗不惡寒者
或已經下其脈浮沈按之有力者皆宜大承氣湯
又曰下利脈浮而滑者內實也利未欲止當下之宜
大承氣湯

雍曰常氏疑本論之誤故欲以葛根黃芩治下利殊
不思仲景以承氣下宿食而合病下利原無治法也
葛根黃芩湯以太陽表未解誤下之利不止者既有
協熱下利之表證未退故可用今合病下利胃氣傷



困只當救胃宜用溫藥故雍以四逆理中補其法胃
氣已負而又加以寒藥則胃穀絕矣仲景於此一證
特論脈負不負蓋欲後人當思陽明少陽土木剋賊
之理而治之可謂盡善矣以是知合併病之論雖二
陽俱受病邪氣俱當去又須審二經五行之氣毋令
相剋賊抑強扶衰以致和氣不使復生一秦助桀爲
虐也如是則胡越可同舟而共濟矣此證和二經退
邪氣與人事不少異非天下至精孰能與於此然生
胃氣制少陽木亦用金石藥嘗見名醫治少陰自汗



自利不止用金液丹取大效既非古藥不敢以爲然
必不得已而用亦須七煉九煉火力重者用之其一
煉火力輕者復可下宿食以虛人老人不敢用承氣
也

仲景問曰人病有宿食何以別之師曰寸口脈浮而
大按之反濇尺中亦微而濇故知有宿食當下之宜
大承氣湯

又曰下利不欲食者以有宿食故也當下之宜大承
氣湯

又曰下利差至其年月日時復發者以病不盡故也
當下之宜大承氣湯

又曰病腹中滿痛者此爲實也當下之宜大承氣湯
大柴胡湯

又曰下利脈反滑當有所去下之乃愈宜大承氣湯
又曰腹滿不減減不足言當下之宜大柴胡湯大承
氣湯雍曰減不足言者言不甚減也論言太陽發汗
不徹不足言與此同意俗語所謂不濟事者是也

又曰傷寒後脈沈沈者內實也下之解宜大柴胡湯



也 雍曰須沈數有力可下之雖沈而微弱遲皆不可下

又曰傷寒六七日目中不了了睛不和無表裏證大便難身微熱者此為實也急下之宜大承氣湯大柴胡湯

又曰太陽病未解脈陰陽俱停必先振慄汗出而解

但陰脈微一作尺脈實者下之而解宜大柴胡湯一法用調胃承

氣湯脈經云但陰微者先下之而解龐作陰實雍曰文當從

脈經及龐氏當作但陰脈微而尺脈實者先下之而



解

又曰脈雙弦而遲者必心下鞭脈大而緊者陽中有陰也可下之宜大承氣湯

又曰結胸者項亦強如柔痙狀下之則和龐氏云宜大陷胸丸

又曰病人無表裏證發熱七八日雖脈浮數者可下之宜大柴胡湯

又曰太陽病六七日表證仍在脈微而沈反不結胸其人發狂者以熱在下焦少腹當鞭滿而小便自利



者下血乃愈所以然者以太陽隨經瘀熱在裏故也
宜下之以抵當湯

又曰太陽病身黃脈沈結少腹鞭滿小便不利者爲
無血也小便自利其人如狂者血證諦也屬抵當湯
又曰傷寒有熱少腹滿應小便不利今反利者爲有
血也當下之宜抵當丸

又曰陽明病發熱汗出者此爲熱越不能發黃也但
頭汗出身無汗劑頸而還小便不利渴飲水漿者以
瘀熱在裏身必發黃宜下之以茵陳蒿湯雍曰先服

茵陳五苓散黃退則不須更下

又曰陽明證其人喜忘者必有蓄血所以然者本有
久瘀血故令喜忘屎雖鞭大便反易其色必黑宜抵
當湯

又曰汗出而讖語者以有燥屎在胃中此爲風也須
下者過經乃可下之下之若早語言必亂以表虛裏
實故也下之愈宜大柴胡湯大承氣湯

又曰病人煩熱汗出則解復如瘧狀日晡所發熱者
屬陽明也脈實者可下之宜大柴胡湯大承氣湯



又曰陽明病讖語有潮熱反不能食者胃中必有燥屎五六枚也若能食者但鞭耳屬大承氣證

又曰下利讖語者有燥屎也屬小承氣湯初一服讖語止若更衣者停後服不爾盡與之

又曰得病二三日脈弱無太陽柴胡證煩躁心下鞭至四五日雖能食以小承氣湯少少與微和之令小安至六日與承氣湯一升若不大便六七日小便少者雖不能食但初頭鞭後必溏此未成鞭也攻之必溏須小便利屎定鞭乃攻之宜大承氣湯

又曰太陽中風下利嘔逆表解者乃可攻之其人熱
熱汗出發作有時頭痛心下痞鞭滿引脇下痛乾嘔
短氣汗出不惡寒者此表解裏未和也屬十棗湯

又曰太陽病不解熱結膀胱其人如狂血自下者愈
其外未解尙未可攻當先解其外外解已但少腹急
結者乃可攻之宜桃核承氣湯龐云不惡寒爲外解
又曰傷寒七八日身黃如橘子色小便不利腹微滿
者屬茵陳蒿湯

又曰傷寒發熱汗出不解心下痞鞭嘔吐而利者屬



大柴胡湯

又曰傷寒十餘日熱結在裏復往來寒熱者屬大柴胡湯

又曰但結胸無大熱者以水結在胸脇也但頭微汗出者屬大陷胸湯

又曰傷寒六七日結胸熱實脈沈而緊心下痛按之石鞭者屬大陷胸湯

又曰陽明病其人多汗以津液外出胃中燥大便必鞭鞭則譫語屬小承氣湯



又曰陽明病不吐不下心煩者屬調胃承氣湯

又曰陽明病脈遲雖汗出不惡寒者其身必重短氣
腹滿而喘有潮熱者此外欲解可攻裏也手足濇然
汗出者此大便已鞭也大承氣湯主之若汗出多微
發熱惡寒者外未解也其熱不潮未可與承氣湯若
腹大滿不通者與小承氣湯微和其胃氣勿令大瀉

下

又曰陽明病潮熱大便微鞭者可與大承氣湯不鞭
者不可與之若不大便六七日恐有燥屎欲知之法



少與小承氣湯入腹中轉失氣者此有燥屎也乃
可攻之若不轉失氣者此但初頭鞭後必澹不可攻
之攻之必脹滿不能食也欲飲水者與水則噦其後
發熱者大便必復鞭而少也宜小承氣湯和之不轉
失氣者慎不可攻之雍曰不轉失氣者勿服藥待一
晝夜熱氣不發瀉定成鞭屎然後可攻

又曰陽明病讞語發熱脈滑而疾者小承氣湯主之
因與承氣湯一升腹中轉失氣者更服一升若不轉
失氣者勿更與之明日又不大便脈反微瀼者裏虛



也爲難治不可更與承氣湯常氏云可人參黃芪建
中湯

又曰二陽併病大陽證罷但發潮熱手足絳熱汗出
大便難而譫語者下之則愈宜大承氣湯

又曰病人小便不利大便乍難乍易時有微熱喘冒
不能臥者有燥屎也屬大承氣湯

又曰大下後六七日不大便煩不解腹滿痛者此有
燥屎也所以然者本有宿食故也屬大承氣湯

龐氏曰脈朝夕駛者實癖也可下之朝平夕駛者非



癍也不可下駛謂數脈六七至者也若脈數一息八九至切不可下若下之則煩躁下利不止而死脈數與皮毛相得亦不可下也雖數爲虛客熱

又曰合下不下令人腹脹滿通身浮腫而死雍曰凡汗下皆不宜大過故汗下後易將理若汗下太過則病人虛難將理易勞復凡用大承氣亦宜消息用調胃承氣代之蓋仲景自有承氣之戒故也

仲景傷寒補亡論卷第十終



仲景傷寒補亡論卷第十一

河南郭雍謹次

發汗吐下後七十三條

仲景曰脈微而濇者此爲醫所病也大發其汗又數
大下之其人亡血病當惡寒後乃發熱無休止時夏
月盛暑欲著複衣冬月盛寒欲裸其身所以然者陽
微則惡寒陰弱則發熱此醫發其汗使陽氣微又大
下之令陰氣弱五月之時陰氣在裏胃中虛冷以陽
氣內微不能勝冷故欲著複衣十一月之時陽氣在



內胃中煩熱以陰氣內弱不能勝熱故欲裸其身又
陰脈遲澹故知亡血也龐氏曰陽微宜四逆湯陰弱
宜苦酒艾之類常氏云宜小建中湯雍曰陽微陰弱
之證其候至微亦未易言仲景初謂亡血之人病當
先寒後乃發熱則一病之內陽微陰弱之證先後俱
見也故言醫發汗使陽氣微又大下之使陰氣弱則
知一病是二證也夏月盛熱欲著複衣冬月盛寒欲
裸其身謂暑月猶有寒不必重言其熱寒月猶有熱
不必重言其寒也若如是則暑月有寒熱寒月亦有



寒熱非五月病者獨見寒十月病者獨見熱也故常
氏用小建中湯似得其意令陰陽兩建之雖藥證相
得第恐力微此外亦無藥矣龐氏分寒熱爲兩證則
陽微用四逆陰弱用酸苦然疾證初不分用藥又難
分也夫然則當見寒時用四逆又恐後乃發熱時熱
太甚不可制若龐氏藥用之于表熱裏寒表寒裏熱
之證則相宜蓋表熱裏寒表寒裏熱白是兩病非陽
微陰弱同病之證也粗工以表熱裏寒表寒裏熱便
爲陽微陰弱者尤非是此證雖甚希有而前人論說



尚多失仲景之意則後人用藥宜審矣

又曰寸口脈浮大而醫反下之此爲大逆浮則無血大則爲寒寒氣相搏則爲腸鳴醫乃不知而反飲冷水令汗大出水得寒氣冷必相搏其人則餽常氏云宜甘草豆蔻散

又曰太陽病三日已發汗若吐若下若溫鍼仍不解者此爲壞病桂枝不中與也觀其脈證知犯何逆隨證治之

又曰脈浮數者法當汗出而愈若下之身重心悸者



不可發汗當自汗出而解所以然者尺中脈微此裏
虛須表裏實津液自和卽自汗出愈常氏云疑缺雍
曰宜柴胡桂枝湯

又曰凡病若發汗若吐若下若亡血若亡津液陰陽
自和者必自愈

又曰大下後復發汗小便不利者亡津液故也勿治
之得小便利必自愈

又曰下之後復發汗必振寒脈微細所以然者內外
俱虛故也常氏云可芪參建中湯



又曰本發汗而反下之此爲逆也若先發汗治不爲
逆木先下之而反汗之爲逆若先下之治不爲逆雍
曰此謂病當先汗而反先下之者故爲逆若已汗而
後下之不爲逆也若病當先下而反先汗之故爲逆
若已下而後汗之不爲逆也

又曰太陽病先下之而不愈因復發汗以此表裏俱
虛其人因致冒冒家當汗出自愈所以然者汗出表
和故也得裏未和然後復下之常氏云可桂枝大柴
胡湯雍曰大字誤當是兩藥先用柴胡桂枝湯和其



表復下之者用大柴胡湯

又曰得病六七日脈遲浮弱惡風寒手足溫醫二三下之不能食而脇下滿痛面目及身黃頸項強小便難者與小柴胡湯後必下重本渴飲水而嘔者柴胡不中與也食穀者噦常氏曰可柴胡桂枝乾薑湯飲水嘔者五苓散噦者小半夏湯

又曰太陽病二三日不能臥但欲起心下必結脈微弱者此本有寒分也反下之若利止必作結胸未止者四五日復下之此作協熱利也常氏云可理中湯



結胸者大陷胸湯協熱利表不解者桂枝人參湯

又曰太陽病下之其脈促

一作緩

不結胸者此爲欲

解也脈浮者必結胸脈緊者必咽痛脈弦者必兩脇拘急脈細數者頭痛未止脈沈緊者必欲嘔脈沈滑者必協熱利脈浮滑者必下血常氏云結胸陷胸湯咽痛豬膚湯兩脇拘急小建中湯頭痛未止小柴胡湯嘔者小半夏湯協熱利者白頭翁湯下血者檨皮湯雍曰檨皮湯用梔子檨皮湯

又曰太陽少陽併病而反下之成結胸心下硬下利



不止水漿不下其人心煩常氏云可陷胸湯雍曰太
少二陽水木無負因下傷胃三陽俱病輕者不成結
胸宜理中湯或無效者宜枳實理中丸

又曰脈浮而緊而復下之緊反入裏則作痞按之自
濡但氣痞耳常氏曰宜小陷胸湯增損理中丸雍曰
先枳實理中湯不解用半夏瀉心湯

又曰傷寒吐下發汗後虛煩脈甚微八九日心下痞
鞭脇下痛氣上衝咽喉眩冒經脈動惕者久而成痿
常氏云可茯苓桂枝五味甘草湯成痿者振痿湯

甘草



湯未見方疑用茯苓
桂枝白朮甘草湯

又曰陽明病不能食若攻其熱必噦所以然者胃中
虛冷故也以其人本虛攻其熱必噦常氏云可溫中
湯小半夏湯雍曰宜理中湯

又曰陽明病脈遲食難用飽飽則微煩頭眩必小便
難此欲作穀疸雖下之腹滿如故所以然者脈遲故
也常氏云可茵陳湯五苓散雍曰此當煎茵陳湯一
物調五苓散作茵陳蒿湯也

又曰夫病陽多者熱下之則鞭汗多極發其汗亦鞭



常氏云可小柴胡湯

又曰太陽病寸緩關浮尺弱其人發熱汗出復惡寒
不嘔但心下痞者此以醫下之也常氏云可生薑半
夏二瀉心湯

又曰太陰之爲病腹滿而吐食不下自利益甚時腹
自痛苦下之必胸下結鞭常氏云可桂枝加芍藥湯
桂枝加大黃湯雍曰本太陽病反下之因腹滿痛轉
屬太陰者桂枝加芍藥湯主之大實痛者用桂枝加
大黃湯今證吐而食不下自利腹滿自痛皆無實證



不可使用桂枝加大黃湯有微寒者當宜桂枝加附子湯存芍藥而不去也

又曰傷寒大吐大下之極虛復極出汗者其人外氣怫鬱復與之水以發其汗因得噦所以然者胃中寒冷故也常氏云可小溫中湯雍曰胃寒甚者理中湯噦者小半夏湯五苓散

又曰吐利發汗後脈平小煩者以新虛不勝穀氣故也常氏曰可調胃承氣湯雍曰勿服藥奪其食則愈以脈平不可再損也



又曰太陽病發汗遂發熱惡寒因復下之心下痞
表裏俱虛陰陽氣並竭無陽則陰獨復加燒鍼因胸
煩面色青黃膚瞶者難治今色微黃手足溫者易愈
常氏云可小柴胡湯桂枝龍骨牡蠣湯雍曰心下痞
者枳實理中丸燒鍼胸煩桂枝加龍骨牡蠣湯所證
未除者桂枝加人參湯

又曰太陽病得之八九日如瘧狀發熱惡寒熱多寒

少其人不嘔清便欲自可一日二三度發脈微

一作浮

緩者爲欲愈也脈微而惡寒者此陰陽俱虛不可更

發汗更下更吐也面色反有熱色者未欲解也以其不能得小汗出身必痒屬桂枝麻黃各半湯

又曰服桂枝湯或下之仍頭項強痛翕翕發熱無汗心下滿微痛小便不利者屬桂枝去桂加茯苓白朮

湯

又曰太陽病先發汗不解而下之脈浮者爲不愈浮爲在外而反下之故令不愈今脈浮故知在外當須解外則愈宜桂枝湯雍曰此證本當先汗所謂若先發汗治不爲逆也



又曰下之後復發汗晝日煩躁不得眠夜而安靜不嘔不渴無表證脈沈遲身無大熱者屬乾薑附子湯
雍曰此證本當先下所謂若先下之治不爲逆也

又曰傷寒若吐若下後心下逆滿氣上衝胸起則頭眩脈沈緊發汗則動經身爲振振搖者屬茯苓桂枝白朮甘草湯

又曰發汗若下之後病仍不解煩躁者茯苓四逆湯
又曰發汗吐下後虛煩不得眠若劇者必反覆顛倒心中懊懣屬梔子豉湯若少氣者梔子甘草豉湯若



吐者梔子生薑豉湯

又曰發汗若下之而煩熱胸中窒者屬梔子豉湯證
又曰太陽證過經十餘日心下溫溫欲吐胸中痛大
便反溏腹微滿鬱鬱微煩先此時自極吐下者當調
胃承氣湯若不爾者不可與但欲嘔胸中痛微溏者
此非柴胡證以嘔故知極吐下也雍曰龐氏云屬調
胃承氣湯誤也本論原無屬字不可妄加此一論當
分作二證所以本論繼之以承氣方者謂前證當用
之方非後證所屬也自若不爾之下非柴胡湯證爲



後證本論門治法宜生薑橘皮湯大半夏加橘皮湯

又曰太陽病重發汗而復下之不大便五六日舌上

燥而渴日晡所小有潮熱

一云日晡所發心胸大煩

從心下至少

腹鞭滿而痛不可近者屬大陷胸湯

又曰傷寒五六日已發汗而復下之胸脇滿微結小

便不利渴而不嘔但頭汗出往來寒熱心煩者此爲

未解也屬柴胡桂枝乾薑湯

又曰傷寒發汗若吐若下解後心下痞鞭噫氣不除

者屬旋覆代赭石湯



又曰傷寒大下之後復發汗心下痞惡寒者表未解
也不可攻痞當先解表表解乃可攻痞解表宜桂枝
湯攻痞宜大黃黃連瀉心湯

又曰傷寒若吐下後七八日不解結熱在裏表裏俱
熱時時惡風大渴舌上乾燥而煩欲飲水數升者白
虎加人參湯

又曰傷寒若吐若下後不解不大便五六日上至十
餘日其人日晡所發潮熱不惡寒獨語如見鬼狀若
劇者發則不識人循衣摸床惕而不安

一作循衣妄
撮恍惕不安

微喘直視脈弦者生瀉者死微者但發熱讖語者屬
大承氣湯

又曰三陽合病腹滿身重難以轉側口不仁面垢讖
語遺尿發汗則讖語下之則額上生汗手足逆冷若
自汗出者屬白虎湯

又曰陽明病脈浮而緊咽燥口苦腹滿而喘發熱汗
出而不惡寒反惡熱身重若發汗則躁心憤憤而反
讖語若加溫鍼必怵惕煩躁不得眠若下之則胃中
空虛客氣動膈心下懊懣舌上胎者屬梔子豉湯龐



氏依論云凡用梔子湯得效卽止後服病人舊微溏者不可與之

又曰陽明病下之心中懊懣而煩胃中有燥屎者可攻其人腹微滿初頭鞭後必溏者不可攻之若有燥屎者宜大承氣湯

又曰陽明病下之其外有熱手足溫不結胸心中懊懣飢不能食但頭汗出者屬梔子豉湯

又曰太陽病若吐若下若發汗後微煩小便數大便因鞭者與小承氣湯和之愈



又曰大汗若大下利而厥冷者屬四逆湯

又曰太陽病下之後其氣上衝者可與桂枝湯若不
上衝不得與之雍曰不上衝者依後三證用桂枝去

芍藥加附子湯桂枝加厚朴杏子湯葛根黃芩黃連

湯

又曰太陽病下之後脈促胸滿者促一作縱屬桂枝去芍

藥湯若微惡寒者桂枝去芍藥加附子湯本論二證脈經合為

一

又曰太陽病桂枝證醫反下之利遂不止脈促一作縱



者表未解也喘而汗出者屬葛根黃芩黃連湯

又曰太陽病下之微喘表未解也屬桂枝加厚朴杏
子湯

又曰傷寒不大便六七日頭痛有熱者與承氣湯其
小便清者知不在裏仍在表也當須發汗若頭痛者
必衄宜桂枝湯常氏云疑其誤當用麻黃湯及各半
湯取大汗雍曰有汗當用桂枝無汗當用麻黃也詳
見衄血門中

又曰傷寒五六日大下之後身熱不去心中結痛者



未欲解也屬梔子豉湯

又曰傷寒下後心煩腹滿臥起不安者屬梔子厚朴

湯

又曰傷寒醫以丸藥大下之身熱不去微煩者屬梔

子乾薑湯

又曰傷寒下之續得下利清穀不止身疼痛者急當

救裏後身疼痛清便自調者急當救表救裏宜四逆

湯救表宜桂枝湯

又曰太陽病過經十餘日反二三下之後四五日柴



胡證仍在者先與小柴胡湯嘔不止心下急其人鬱
鬱微煩者爲未解可與大柴胡湯下之愈雍曰與小
柴胡湯嘔止小安者勿服大柴胡也

又曰傷寒十三日不解胸脇滿而嘔日晡所發潮熱
已而微利此本柴胡證下之不得利今反利者知醫
以丸藥下之非其治也潮熱者實也先宜服小柴胡
湯以解外後以柴胡加芒消湯主之

又曰傷寒十三日過經讖語者以有熱也當以湯下
之若小便利者大便當鞭而反下利脈調和者知醫



以丸藥下之非其治也若自下利者脈當微厥今反和者此爲內實也屬調胃承氣湯

又曰傷寒八九日下之胸滿煩驚小便不利讖語一身盡重不得轉側者屬柴胡加龍骨牡蠣湯

又曰火逆下之因燒鍼煩躁者屬桂枝甘草龍骨牡蠣湯

又曰太陽病脈浮而動數浮則爲風數則爲熱動則爲痛數則爲虛頭痛發熱微盜汗出而更惡寒表未解也醫反下之動數變遲膈內拒痛一作頭痛即眩胃中空



虛客氣動膈短氣煩躁心中懊懺陽氣內陷心下因
鞭則爲結胸屬大陷胸證若不結胸但頭汗出餘處
無汗劑頸而還小便不利身必發黃常氏云可茵陳
蒿湯調五苓散

又曰傷寒五六日嘔而發熱者柴胡湯證具而以他
藥下之柴胡證仍在者復與柴胡湯此雖已下之不
爲逆必蒸蒸而振卻發熱汗出而解若心下滿而鞭
痛者此爲結胸也大陷胸湯主之若但滿而不痛此
爲痞柴胡不中與之屬半夏瀉心湯



又曰本以下之故心下痞與瀉心湯痞不解其人渴而口燥煩小便不利者屬五苓散

脈經云一方言忍之一日乃愈

又曰傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也屬甘草瀉心湯

又曰傷寒服湯藥下利不止心下痞鞭服瀉心湯已復以他藥下之利不止醫以理中與之利益甚理中者理中焦此利在下焦服赤石脂禹餘糧湯復利不



十一
十四
止者當利其小便龐氏云可五苓散

又曰太陽病外證未除而數下之遂協熱而利利下不止心下痞鞭表裏不解者屬桂枝人參湯

又曰下後不可更行桂枝湯汗出而喘無大熱者屬麻黃杏子甘草石膏湯

又曰病人無表裏證發熱七八日脈雖浮數者可下之假令已下脈數不解合熱則消穀善飢至六七日不大便者有瘀血也屬抵當湯

又曰若脈數不解而下不止必協熱便膿血

又曰本太陽病醫反下之因而腹滿時痛者屬太陰也桂枝加芍藥湯主之大實痛者屬桂枝加大黃湯又曰傷寒六七日大下後寸脈沈而遲手足厥冷下部脈不至咽喉不利吐膿血瀉利不止者爲難治屬麻黃升麻湯

又曰傷寒本是白寒下醫復吐下之寒格更逆吐下若食入口卽出屬乾薑黃芩黃連人參湯此證依脈經定

千金翼曰大下後口燥者裏虛故也



龐氏曰因發汗時汗出如水漏下還復汗少喘促不止脈促而按之濡者今當汗而解脈促而按之實者死若脈浮手足微厥面垢脣青昏憤而喘者陰陽未和氣阻升降宜服順陰湯五味子湯

又曰發汗或下後痞滿或成結胸氣塞不通宜檳榔散

仲景傷寒補亡論卷第十一終



仲景傷寒補亡論卷第十二

河南郭雍撰次

病可溫十三條

病不可灸七條

病可灸八條

病不可刺八條

病可刺二十九條

病不可水十條

病可水八條

病不可火十一條

病可火二條

火邪三條

病可溫十三條

雍曰仲景本論門自三陰三陽至發汗吐下以後證



而終自病可溫以下本論原無門目其論說皆仲景
之言其見於三陽三陰諸門者王叔和重出於脈經
以備倉猝尋按今依脈經所撰錄諸後

仲景曰大法冬宜服熱藥及灸

又師曰病發熱頭痛脈反沈若不差身體疼痛當救
其裏宜溫藥四逆湯雍曰凡溫藥皆用四逆湯厥脈
細者宜當歸四逆湯凡脈微欲絕及脈不出者通脈
四逆湯內有久寒者當歸四逆加吳茱萸生薑湯主
之



又曰下利腹脹滿身體痛先溫其裏宜四逆湯

又曰自利不渴者屬太陰以其藏有寒故也當溫之
宜四逆輩

又曰少陰病其人飲食入口則吐心中溫溫欲吐復
不能吐始得之手足寒脈弦遲若膈上有寒飲乾嘔
者不可吐當溫之宜四逆湯

又曰少陰病脈沈者急溫之宜四逆湯

又曰下利欲食者就當溫之

又曰下利脈遲緊爲痛未欲止當溫之得冷者滿而



便腸垢

又曰下利其脈浮大此爲虛以強下之故也設脈浮革因爾腸鳴當溫之宜當歸四逆湯

又曰少陰病下利脈浮濇者必嘔汗出必數更衣反少當溫之

又曰傷寒醫下之續得下利清穀不止身體疼痛急當救裏宜溫之以四逆湯

龐氏以凡病發熱頭疼脈反沈若不差身體疼痛者脈浮遲表熱裏寒下利清穀者汗出熱不去內拘急



支節疼四逆者下利厥逆惡寒者下利腹痛脹滿身
疼痛脈浮者凡五證先用四逆湯溫其裏得利止乃
可隨證用藥攻表也

病不可灸七條

仲景曰微數之脈慎不可灸因火爲邪則爲煩逆追
虛逐實血散脈中火氣雖微內攻有力焦骨傷筋血
難復也常氏云宜桂枝去芍藥加蜀漆牡蠣龍骨救
逆湯欲其有汗宜柴胡桂枝湯

又曰脈浮當以汗解而反灸之邪無從出因火而盛



病從腰以下必重而痺名爲火逆若欲自解當先煩
乃有汗隨汗而解何以知之脈浮故知汗出當解

又曰火逆下之因燒鍼煩躁者桂枝甘草龍骨牡蠣
湯主之

又曰脈浮熱甚而灸之此爲實實以虛治因火而動
必咽燥吐血

又曰傷寒脈浮醫以火迫劫之亡陽驚狂臥起不安
者桂枝去芍藥加蜀漆牡蠣龍骨救逆湯

龐氏曰灸及燒鍼之後證以火劫者並宜火劫法治

之煩躁驚及狂用六石風引湯尤良柴胡加龍骨牡
蠣湯亦通用

又曰不當灸而誤灸令火邪入腹干錯五藏重加煩
死雍曰凡火邪逆證者宜桂枝甘草龍骨牡蠣湯

病可灸八條

仲景曰燒鍼令其汗鍼處被寒核起而赤者必發奔
豚氣從少腹上衝心者灸其核上一壯與桂枝加桂
湯更加桂

又曰少陰病得之一二日口中和其背惡寒者當灸



之

又曰少陰病吐利手足不逆冷反發熱者不死脈不至者灸少陰七壯雍曰凡灸少陰下利諸證皆兼服四逆湯

又曰少陰病下利脈微瀉嘔而汗出必數更衣反少

當溫其上灸之一云灸厥陰五十壯

當灸百會

又曰諸下利皆可灸足大都五壯

一云七壯

商邱陰陵泉

又曰下利手足厥無脈灸之不溫脈不還反微喘者死少陰負趺陽者為順也



又曰傷寒脈促手足厥逆可灸之爲灸少陰厥陰主
逆

龐氏曰當灸不灸令病人冷結久而彌固氣衝心必
死

病不可刺八條

雍曰脈經與可刺不可刺二門所載素問靈樞經語
又有異者今改從本經字有當者卽從脈經仍據所
出之處以別非仲景之言

靈樞經曰九刺之禁 新內勿刺已刺勿內 大怒



勿刺已刺勿怒 方醉勿刺已刺勿醉 大勞勿刺
已刺勿勞 大飢勿刺已刺勿飢 大渴勿刺已刺
勿渴 大驚大恐必定其氣乃刺之又曰粗工勿察
是謂伐身

靈樞又曰母刺熇熇之熱母刺漉漉之汗母刺渾渾
之脈此刺病與脈相逆者

又曰五藏之腧出於背者灸之則可刺之則不可

靈樞又曰熱病身熱甚陰陽皆靜脈經作爭者勿刺之其

可刺者急取之不汗出則瀉所謂勿刺者有死徵也

靈樞又曰上工刺其未生者也其次刺其未盛者也其次刺其已衰者也脈經云粗工逆此謂之伐形

靈樞又曰熱病不可刺者有九一曰汗不出大顴發赤噦者死二曰瀉而腹滿甚者死三曰目不明熱不已者死四曰老人嬰兒熱而腹滿甚者死五曰汗不出吐下血者死六曰舌本爛熱不已者死七曰欬而衄汗不出出不至足者死八曰髓熱者死九曰熱而瘕者死凡此九者不可刺也脈經無此素問靈樞禁不刺者甚多詳見補亡禁刺門



仲景曰太陽傷寒者加溫鍼必驚也常氏云宜服救

逆湯

病可刺二十九條

仲景曰太陽病頭疼至七日自愈者其經竟故也

竟字

仲景作盡若欲再作經者鍼足陽明使經不傳則愈

龐氏云補

三里穴

又曰太陽病初服桂枝湯而反煩不解者當先刺風

池風府卻與桂枝湯則愈

又曰傷寒腹滿而讖語寸口脈浮而緊者此為肝乘



脾名曰縱刺期門

又曰傷寒發熱嗇嗇惡寒其人大渴欲飲水漿者其腹必滿若自汗出小便利其病欲解此肝乘肺也名曰橫刺期門

又曰陽明病下血讖語此爲熱入血室但頭汗出者當刺期門隨其實而瀉之澌然汗出則愈

又曰婦人中風發熱惡寒經水適來得之七八日熱除脈遲身涼胸脇下滿如結胸狀譫語此爲熱入血室當刺期門隨其實而瀉之叔和曰平病云熱入血



室無犯胃氣及上二焦雍曰與此相反豈謂藥不謂

鍼耶

又曰太陽與少陽併病頭痛頸項強而眩時如結胸
心下痞鞭當刺大椎第一間肺俞肝俞慎不可發汗
發汗則讖語脈弦五日不止當刺期門

又曰少陰病下利便膿血可刺

又曰婦人懷身傷寒腹滿不得小便從腰以下重如
有水氣狀懷身七月太陰當養不養此心氣實當刺
寫勞宮及關元小便利則愈



又曰傷寒喉痺刺于少陰在腕當小指後動脈是也
鍼入三分補之素問曰有病身熱汗出煩滿不爲汗
解此爲何病岐伯曰汗出而身熱者風也汗出而煩
滿不解者厥也病名曰風厥巨陽主氣故先受邪少
陰與其爲表裏也得熱則上從之從之則厥也表裏
刺之飲之湯劑雍曰此傷寒感異氣變而爲風厥也
宜刺太谿崑崙服茯苓桂枝甘草大棗湯

靈樞經曰熱病三日氣口靜人迎躁者取之諸陽五
十九刺以瀉其熱而出其汗實其陰以補其不足素



問曰病甚者爲五十九刺靈樞曰所以五十九刺者

兩手內外側各三凡十二痛五指間各一凡八痛足

亦如之

亦八痛也

頭入髮一寸傍三分各三凡六痛更入

髮三寸邊各五凡十痛耳前後口

一作耳

下項中各一

凡六痛巔上一顙會一髮際一廉泉一風池二天柱

二此五十九穴也

雍曰五十九刺出於二經見於仲景叔和二書然未

聞有善用之者古人第存之而不敢廢上古之法後

有靈樞十一證亦多不能解者亦不能廢法耳



靈樞經曰熱病先膚痛窒鼻充面取之皮以第一鍼

五十九苛軫

一云苛幹

鼻索皮於肺不得索之火火心也

軫車上前後兩端橫木也言鼻塞之甚內外不通亦猶軫之橫塞也

又曰熱病噤乾多飲善驚臥不得安

一作臥不能起

取之膚

肉以第六鍼五十九目眦青索肉於脾不得索之木

木肝也

又曰熱病面青腦痛手足煩取之筋閒以第四鍼鍼

於四逆

一作邊

筋辟

一作壁

目浸索筋於肝不得索之金

金肺也



又曰熱病數驚瘈瘲而狂取之脈以第四鍼急瀉有

餘者癩疾毛髮去索血一作脈於心不得索之水水腎

也

又曰熱病而身重骨痛耳聾而好瞑取之骨以第四

鍼五十九刺骨病食一作不食齧牙齒耳青一作清索骨於

腎不得索之土土脾也

又曰熱病先身傍敦太素作倚本經作濇倚而熱煩悶乾唇口噤

取之脈以第一鍼五十九膚脹口乾寒熱本經作寒汗出索

脈於心不得索之於水水者腎也



又曰熱病頭痛顛顛目瘳脈痛善衄厥熱病也取之
以第三鍼視有餘不足寒熱痔

又曰熱病體中病重腸中熱取之以第四鍼於其膈
及下諸指閒索氣於胃絡得氣也

又曰熱病俠臍急痛胸脇支滿取之湧泉與太陰陽

明經作陰以第四鍼鍼嗑裏

又曰熱病而汗且出之經作及脈順可汗者取之魚際

太淵大都太白瀉之則熱去補之則汗出汗出太甚

者取內踝上橫文一作脈以止之



又曰熱病七八日脈口動喘而短者兼刺之汗且自
出淺刺手大指閒

素問曰熱病先胸脇痛手足躁刺足少陽補足

手一作

太陰病甚者爲五十九刺王冰云足少陽邱虛取之
又曰熱病始手臂痛者刺手陽明太陽而汗出止王
云臂痛列缺主之取汗商邱主之

又曰熱病始於頭首者刺項太陽而汗出止王云足
太陽天柱主之

又曰熱病先身重骨痛耳聾好瞑刺足少陰病甚爲



五十九刺

又曰熱病先眩冒而熱胸脇滿刺足少陰少陽

又曰熱病始于足脛者刺足陽明而汗出止此出甲

乙經

病不可水十條

仲景曰發汗後飲水多者必喘以水灌之亦喘常氏云微喘宜麻黃杏子甘草石膏湯雍曰飲水多者五苓散

又曰傷寒大吐大下之極虛復極汗出者其人外氣

怫鬱復與之水以發其汗因得噦所以然者胃中寒冷故也常氏曰可小溫中湯小半夏湯雍曰胃寒理中湯噦者半夏湯五苓散

又曰陽明病潮熱大便微鞭可與承氣湯不堅勿與之若不大便六七日恐有燥屎欲知之法可與小承氣湯若腹中不轉失氣者此但初頭鞭後必溏不可攻之攻之必脹滿不能食欲飲水者與水則噦雍曰可溫中湯噦者小半夏湯

又曰下利其脈浮大此爲虛以強下之故也設脈浮



革因爾腸喘當溫之與水噦雍曰宜溫中湯

又曰病在陽當以汗解而反以冷水噦之若灌之其
熱被劫不得去彌更益煩皮上粟起意欲飲水反不
渴宜文蛤散若不差與五苓散若寒食結胸無熱證
者與三物小陷胸湯白散亦可服身熱皮粟不解欲
引衣自覆若以水灌之洗之益令熱劫不得出當汗
而不汗卽煩假令汗出已腹中痛與芍藥三兩如上
法

又曰寸口脈浮大醫反下之此爲大逆浮則無血大



則爲寒寒氣相搏則爲腸鳴醫乃不知而反飲冷水
令汗大出水得寒氣冷必相搏其人則餒常氏云宜
草豆蔻散

又曰寸口脈濡而弱濡則惡寒弱則發熱濡弱相搏
藏氣衰微胸中苦煩此非結熱而反薄居水漬布冷
銚貼之陽氣遂微諸府無所依陰脈凝聚結在心下
而不肯移胃中虛冷水穀不化小便縱通復不能多
微則可救聚寒心下當奈何也

千金翼曰太陽病小便利者爲水多心下悸雍曰宜



小半夏加茯苓湯

仲景曰凡得時氣病至五六日而渴欲飲水飲不能多不當與也何者以腹中熱尚少不能消之便更與人作病也至七八日大渴欲飲水者猶當依證而與之與之常令不足勿極意也言能飲一斗與五升若飲而腹滿小便不利若喘若噦不可與之也飲而忽然大汗出是爲自愈也

又曰凡得病反能飲水者此爲欲愈之病其不曉病者但聞病人飲水自愈小渴者乃縱與之飲因成其

禍不可復救也龐氏曰凡病非大渴不可與飲冷水若小渴口燥咽乾少少呷水滋潤之若不與水則乾燥無由作汗煩喘而死者多矣但勿令足意飲也若不汗將來燥渴甚者但足意飲之勿疑若小渴強飲者致停飲心下滿結喘而死者多矣其有熱脈數尙可作汗而解出者不幸之幸也

病可水八條

仲景曰太陽病發汗後若大汗出胃中乾煩躁不眠其人欲得飲水者當稍飲之令胃中和則愈



又曰厥陰病渴欲飲水者少少與之愈

又曰太陽病寸緩關浮尺弱其人發熱汗出復惡風寒不嘔但心下痞者此爲醫下之也若其不下病人不惡寒而渴者爲轉屬陽明小便數者大便則堅不更衣十日無所苦也渴欲飲水少少與之但以法救

之渴者宜五苓散

又曰寸口脈洪而大數而滑洪大則榮氣長滑數則胃氣實榮氣長則陽盛怫鬱不得出身胃實則堅難大便則乾燥三焦閉塞津液不通醫發其汗陽氣不



週復重下之胃燥畜熱大便遂燥小便不利榮衛相
 搏心煩發熱兩眼如火鼻乾面赤舌燥齒黃焦故大
 渴過經成壞病鍼藥所不能制與水灌枯槁陽氣微
 散身寒溫衣覆令汗出表裏通然其病即除形脈都
 不同此愈非治法但醫所當慎妄犯傷榮衛
 又曰嘔吐而病在膈上後思水者解急與豬苓散飲
 水亦得也千金亦曰必思煮餅急思水者與五苓散
 飲之

餘同

又曰霍亂而頭痛發熱身體疼痛熱多飲水者屬五



苓散

龐氏曰病人水藥入口則吐或渴而嘔者或汗後脈尚浮而煩渴者或下利渴而小便不利者或嘔而小便不利者五苓散皆主之或因渴停水心下短息者難治

又曰若頭痛無熱但狂言煩躁不安精神不與人相當勿以火導之但以豬苓散方寸匕服之當連飲新水三升卽令指刺喉中吐去之病隨手愈若不能吐者而強與水水停則結心下也當以藥吐之不爾更



致危病若當吐不時以豬苓散吐之其死殆速矣亦
可鍼之佳水飲膈實難治此三死一生也

千金
之文

病不可火十一條

仲景曰太陽中風以火劫發其汗邪風被火熱血氣
流溢失其常度兩陽相熏灼其身發黃陽盛則欲衄
陰虛小便難陰陽俱虛竭身體則枯燥但頭汗出劑
頸而還腹滿微喘口乾咽爛或不大便久則讖語甚
者至噦手足躁擾循衣摸床小便利者可治雍曰宜
桂枝去芍藥加蜀漆牡蠣龍骨救逆湯五苓散



又曰太陽病醫發汗遂發熱惡寒復下之則心下痞
此表裏俱虛陰陽氣併竭無陽則陰獨復加燒鍼因
胸煩面色青黃膚暍者難治今色微黃手足溫者易
愈雍曰發熱惡寒宜小柴胡湯心下痞者生薑瀉心
湯火逆宜救逆湯

又曰陽脈浮陰脈弱則血虛虛則筋急其脈沈者榮
氣微也其脈浮而汗出如流珠者衛氣衰也榮氣微
者加燒鍼則血流不行更發熱而煩躁也雍曰和榮
衛宜柴胡桂枝湯因燒鍼煩躁者宜桂枝甘草龍骨

牡蠣湯也

又曰傷寒脈浮醫以火劫迫之亡陽必驚狂臥起不安者屬桂枝去芍藥加蜀漆牡蠣龍骨救逆湯

又問曰得病十五六日身體黃下利狂欲走師脈之言當下清血如豚肝乃已後如師言何以知此師曰

寸口脈陽浮而陰濡陽浮爲風陰濡爲弱爲少血

一作

虛浮虛受風少血發熱惡寒洒淅項強頭眩醫加以

火熏等令汗出惡寒遂罷客熱因火而發怫鬱蒸肌膚身目爲黃小便微難短氣從鼻中出血而復下之

胃無津液瀉利遂不止熱瘀在於膀胱蓄結成積聚
狀如豚肝當下不下心亂迷憤奔走赴水不能自制
畜血若去目明心了此皆醫所爲他無禍患微輕者
得愈重極者不治雍曰宜犀角地黄湯有熱如狂者
加黃芩

又曰形作傷寒其脈不弦緊而弱弱者必渴被火者
識語弱者發熱脈浮解之當汗出愈雍曰宜救逆湯
又曰太陽病以火熏之不得汗其人必躁到經不解
必圍血雍曰宜犀角地黄湯



又曰陽明病被火額上微汗出而小便不利必發黃
常氏云可茵陳湯五苓散

又曰陽明病其脈浮緊咽乾口苦腹滿而喘發熱汗
出不惡寒反惡熱身體重發汗則躁心憤憤而反讞
語加溫鍼必怵惕煩躁不得眠雍曰宜桂枝甘草龍
骨牡蠣湯若誤下者梔子豉湯龐氏曰脈浮緊不可
下恐變風溫宜詳之

又曰少陰病欬而下利譫語是謂被火氣劫也故小
便必難爲強責少陰汗也常氏云宜用救逆湯解其



火氣五苓散通其小便

又曰太陽病二日反躁反熨其背大汗出火氣入胃
胃中水竭躁煩必發讖語十餘日振慄自下利者此
爲欲解也故其汗從腰以下不得汗其人欲小便不
得反嘔欲失溲足下惡風大便鞭小便常數而反不
數及多大便已其頭卓然而痛其人足心必熱穀氣
下流故也雍曰大便堅及煩躁譫語者宜調胃承氣
湯以和其胃不得小便者宜五苓散

病可火二條



仲景曰下利穀道中痛當溫之當以熬鹽末熨之一
方炙枳實熨之千金翼云宜炙枳實若熬鹽等如炒
蠶沙之類皆可熨龐氏言枳實末與鹽相兼用益佳
或單用枳實末非枳實須逐片炙用卽枳殼也

龐氏曰臍中冷結不可便熨冷氣攻心腹必死須先
用藥溫之久而可熨之又曰臍下冷結或關陽去者
大小便不通服藥雖多不見效炒鹽熨臍下須臾卽
通若病人已服巴豆甘遂大黃輕粉之類過多者略
通則大利而損人宜詳之



火邪三條

龐氏曰傷寒醫以火置臥床下或周身用火迫劫汗
或熨或誤灸皆火邪也仲景曰傷寒脈浮醫以火迫
劫之亡陽必驚狂或臥起不安者宜桂枝去芍藥加
蜀漆牡蠣龍骨救逆湯又曰火逆下之因燒鍼煩躁
者桂枝甘草湯主之雍曰可代救逆湯用之
龐氏曰灸及燒鍼後證似火劫者並宜以火劫治之
煩躁驚及狂用金匱風引湯尤良柴胡加龍骨牡蠣
亦通用



千金方曰其病形不可灸因火爲邪散走血脈傷脈
尙可傷藏則劇并兪冗腫黃汗自出經絡外爛肉腐
爲癰膿此爲火疸醫所傷也雍曰千金翼有火疸一
證錯簡在狐惑後又併微數之脈不可灸證合爲一
又云應用瀉心湯其言舛謬不可讀微數之脈不可
灸已見本門獨畱火疸一證似屬火邪故錄於此外
臺以瀉心湯治蝕於上部屬狐惑亦係火疸微數脈
於後其誤久已

仲景傷寒補亡論卷第十二終



仲景傷寒補亡論卷第十三

河南益郭 雍公 譔 次

兩感證五條

陰陽交十一條

三陽合病十五條

結胸二十二條

心下痞二十五條

兩感證五條

素問曰人之傷於寒也則爲病熱熱雖甚不死其兩感於寒而病者必不免於死

又曰兩感於寒者病一日則巨陽與少陰俱病則頭



痛口乾煩滿而渴二日則陽明與太陰俱病則腹滿
身熱不欲食讖語三日少陽與厥陰俱病則耳聾囊
縮而厥水漿不入不知人六日死病源曰水漿不入
不知人則六日而死其義甚明

問曰素問言不知人六日死又言三日其氣乃盡何
也雍曰兩感之病表裏俱傳三日而六經竟雖竟而
氣未絕故經竟之後又二日其氣乃絕其言三日者
謂三日而陽明之氣方盡故也言六日者通傳經之
日也傳經三日氣盡故言六日何以明之三日經竟

之時五藏已傷六府不通榮衛不行如是之後又三日氣盡乃死帝以疑而問之而岐伯告以陽明氣血盛不知人三日而後死也經既曰如是之後則是傳六經竟之後也又曰不知人三日則是陽明未絕之時也經意甚明而或者謂其傳六經而後死夫能再傳則不死矣本以邪氣傳至少陽欲傳太陰之間而太陰已先與陽明同受邪氣不能更受後來再傳之邪雖太陰復欲以邪傳之三陽而三陽邪氣亦皆滿亦不更爾容受兩邪相拒六經皆滿俱不能流注傳



瀉是以六府不通榮衛不行水漿不入不知人以待
陽明之氣盡而後死矣陽明胃經也胃爲血氣之海
朝夕灌注榮衛六府十二經者皆胃之氣血也諸經
雖絕獨陽明氣血未盡故又三日而後死也六日死
三日死只是兩感一證或者謂再傳爲六日死邪氣
直入陽明爲三日死遂分兩證此說甚誤未通經意
又不當改經血氣盛爲邪氣盛仍有血氣隨邪而盡
之說皆失也反覆讀經當自得之龐氏曰兩感之疾
素問無脈候今詳之凡脈沈者皆屬陰也一日脈當



沈而大沈者少陰也大者太陽也二日脈當沈而長
三日脈當沈而弦乃以合表裏之脈沈長弦皆隱於
沈大也凡三陰無合病惟三陽有合病今三陽與三
陰合病故其脈似沈緊而大似沈實而長亦類革至
之死脈也

王仲弓曰監丞曰本論言兩感俱作治有先後發表
攻裏本自不同近時張翊云論有傷寒醫下之利不
止身疼痛者急當救裏後身疼痛清便自調者急當
救表今可依倣而治既云治有先後則宜先救裏內



纔溫則可醫然救表亦不可緩也朱氏曰內尤爲急也雍曰救裏藥用四逆救表藥用桂枝湯此法出於不得已猶愈於束手待斃矣仲景曰救裏藥用四逆救表藥用桂枝湯更看臨時寒熱多少參訂之幸有表裏一輕者則急治其重者也然其治大宜速過三日則水漿不入雖有藥不納已張亦未悟此也

兩感論曰病人有不治之證古人不復論方藥者立論固可如此醫家亦可如此而人有父兄母弟至親不幸遇疾如此能坐視不思拯援萬死一生之術哉



孫真人論精神困者病久不差欲死者但與藥救之
十人中或差三四以是言則人雖有不治之病其氣
未絕之間亦無不服藥待盡之理今觀兩感之證以
陰陽之經邪氣皆滿不相來往傳注故爲必死之候
乘其三日內邪氣未滿榮衛可通之時早爲療治尙
或不死若六經邪氣三日旣滿則水漿不入湯藥何
緣可納勢須於初覺之時急治之然初感之日誰能
斷然不疑知其爲兩感擬議之間已不及矣是以必
至於死也雍謂湯藥至此不如鍼灸湯藥雖可內攻



而內攻未必至雖至而藥病方有勝負鍼艾可以外
瀉隨其輕重必有瀉而出者昔虢太子之死扁鵲治
之蓋外瀉之術也方其厥氣上行絕陽破陰有甚於
兩感不知人之證扁鵲以爲陽脈下墜陰脈上爭令
氣閉而不通夫厥氣亦邪氣也陽脈陰脈者卽陽經
陰經也陽脈下墜猶傳之陽也陰脈上爭相搏而不
能受也氣閉不通以陰陽俱邪實故不通不通則水
漿不入矣越人於是不施湯劑而遽用鍼石外取三
陽五會有間太子蘇是知湯不能達於外而鍼尙可



瀉於外也既蘇而得爲五分之熨以逐餘邪邪去然
後得服湯藥二旬而復故倘使湯先必不能得入何
緣有復蘇之理今兩感之邪與尸厥之邪其暴殺人
一也誠能倣越人先鍼後湯之術取之三陽使三陽
氣緩然後灼三陰之會以瀉其邪邪氣未盡方以湯
攻使無所逃既盡則以湯養之雖生死未可必而其
爲治有所據而不謬矣故愚意欲先取崑崙委中乃
去其血以瀉太陽次取三里以瀉陽明後取邱墟陽
陵泉以瀉少陽三陽氣既緩急灸三陰交穴以瀉三



陰之邪此穴亦難取或上下左右少差卽能中一陰
二陰不中必三陰俱中仍須審度再分灸之上陰陵
泉可瀉太陰太谿可瀉少陰大敦可瀉厥陰炷如麥
粒緩緩灸之徐瀉其氣不必以多爲貴也雖其如此
亦不可以不灸三陰交先併瀉之然後分得陰陽得
陰陽緩乃可服湯瀉不患多治不厭速蓋有三日之
期不可待也所以不敢用熨者必爲火邪故惟用湯
二者皆陰氣閉不通之疾大略相似而其爲寒熱則
異也以是思之則三陰合病之中脈有負者亦宜灸

刺以治之且如陽明少陽合病其脈負者少陽木氣盛也瀉邱墟陽陵泉則少陽木氣不得不平補三里則陽明之土不得不旺或不精補瀉者第以刺爲瀉灸爲補古人皆有是法如是則雖死亦有可生理所謂十中三四愈者未必不如孫氏之言也雖然天下之事固有大小同異而其理一也昔洪水橫流汎濫於中國禹決九川然後人得平土而居之愚因誦此而得通病有外瀉之理使早得而熟之則越人氏之學何難至之顏淵曰舜何人也予何人也有爲者亦



若是况盧扁乎惜余得之暮年所用之小也然亦不敢不告諸來者故備言之

陰陽交十一條

素問三十三篇曰有温病者汗出輒復熱而脈躁疾不爲汗衰狂言不能食岐伯曰病名陰陽交交者死也人所以汗出者皆生於穀穀生於精今邪氣交爭於骨肉而得汗者是邪卻而精勝也精勝則當能食而不復熱復熱者邪氣也汗者精氣也今汗出而輒復發熱者是邪勝也不能食者精無俾也汗而熱雷



者其壽可立而傾也

又曰熱論曰汗出而脈尚躁盛者死今脈不與汗相應此不勝其病也其死明矣狂言者是失志失志者死今見三死不見一生雖愈必死也雍曰汗出輒復熱一死脈尚盛二死狂言失志三死也

靈樞二十三篇曰熱病已得汗而脈尚躁盛者此陰脈之極也死其得汗而脈靜者生雍曰此二證脈經皆以爲陰陽交疑以得汗者爲交不得汗者非交也又曰熱病已得汗而脈尚躁且復熱勿膚刺喘甚者



死

脈經曰熱病陰陽交者死又曰熱病煩已而汗脈當靜

又曰太陽病已得汗脈反躁盛者是陰陽交死復得汗脈靜者生

又曰熱病陰陽交者熱煩心躁太陰寸口脈兩部尙躁盛是陰陽交死得汗脈靜者生雍曰已上二證與前同靈樞不言陰陽交此言陰陽交爲異脈經所載皆古書此二證莫知所出也



又曰熱病陽進陰退頭獨汗出者死陰進陽退腰已下至足汗出者死陰陽俱進汗出已熱如故亦死陰陽俱退汗出已寒慄不止鼻口氣冷亦死已上十證並見脈經陰陽交部

又曰熱病所謂併陰者熱病已汗因得瀉是謂併陰

故治一作活

又曰熱病所謂併陽者熱病已得汗脈尚躁盛火熱

汗出雖不汗出若衄

龐氏云和而衄

者是謂併陽故治雍曰

并陰陽二證諸書無所見亦類陰陽交故脈經繼之



於其後

陰陽交論曰傷寒兩感陰陽交二證皆出於素問仲
景發明兩感而不及陰陽交王叔和載陰陽交而不
及兩感後世因仲景而明兩感之證獨陰陽交多所
未解予考陰陽交之證大抵傷寒脈不爲汗解者皆
陰陽交也何以不爲汗解曰獨陰獨陽之病一汗則
解陰兼陽陽兼陰之病一汗不能解蓋汗解其陰陽
脈不得退汗解其陽陰脈不得退此所以不爲汗衰
也然則陰兼陽陽兼陰者何病也余悉索之則兩感



之證似之一日太陽與少陰俱病二日陽明與太陰
俱病皆陰兼陽陽兼陰也陰陽相兼而病故其病名
曰交是以太陽汗解而少陰未得解陽明汗解而太
陰未得解者豈非因其相交而不爲汗衰乎觀二證
之言初若不相同合二證陰陽之理則無異也故素
問言兩感本非病名至陰陽交則曰病名陰陽交蓋
兩感言其始感陰陽交者著其名也故陰陽交之證
有曰復得汗脈靜者生是邪氣再出而復生也仲景
亦曰發表攻裏本自不同豈非再乎故遇斯病者當



參二證而治之然則仲景發明兩感而不及陰陽交
叔和載陰陽交而不言兩感意豈異乎更俟賢哲明
之

三陽合病十五條

龐氏曰凡三陰無合病惟三陽有合病十四證其三
陰三陽相并而病者卽兩感是也雍曰合病十四證
已見三陽經今重列於下非惟便於檢按亦相附參
考易明庶無差矣

仲景曰太陽與陽明合病者必自下利葛根湯主之

又曰太陽與陽明合病不下利但嘔者葛根加半夏湯主之

又曰太陽與陽明合病喘而胸滿者不可下宜麻黃湯

仲景問曰何緣得陽明病答曰太陽病若發汗若下若利小便亡其津液胃中乾燥因轉屬陽明不更衣大便難者此陽明病也雍曰無太陽證者宜調胃承氣湯凡轉屬之法與合病微不同且如太陽陽明合病必須解兩經之邪故仲景不捨葛根麻黃二湯若



轉屬陽明可以少俟太陽證衰卽以調胃承氣湯專
攻陽明一舉而兩得之蓋太陽爲既往則當日衰陽
明爲方來則當日盛故也

又曰二陽併病太陽證罷但發潮熱手足熱汗出
大便難而讖語者下之則愈宜大承氣湯朱氏曰若
太陽證不罷不可下宜桂枝麻黃各半湯小發其汗
雍曰若太陽不罷者宜少俟一日又不罷則依朱氏
法

又曰二陽併病太陽初得病時發其汗汗先出不徹



因轉屬陽明續自微汗出不惡寒若太陽病證不罷者不可下下之爲逆如此可小發汗設面色緣緣正赤者陽氣怫鬱在表當解之熏之一作蒸若發汗不徹不足言陽氣怫鬱不得越當汗不汗其人躁煩不知痛處乍在腹中乍在四肢按之不可得其人短氣但坐以汗出不徹故也更發汗則愈何以知汗出不徹以脈濇故知之雍曰宜桂枝麻黃各半湯

問曰太陽陽明合病併病二者之證何以別之朱氏曰脈浮大而長頭疼腰痛肌熱鼻乾目疼者合病也



太陽初得病時發其汗汗先出不徹因轉屬陽明續
自微汗出不惡寒者併病也雍曰合病脈浮大而長
者未必惡寒其脈浮緊而長無汗者當惡寒也皆宜
桂枝麻黃各半湯有下證者自宜前法

仲景曰太陽與少陽併病頭項強痛或眩冒時如結
胸心下痞鞭者當刺大椎第一間肺俞肝俞慎不可
發汗發汗則讖語脈弦五六日譫語不止刺期門雍
曰仲景言少陽不可發汗故併病亦不可汗也
又曰太陽少陽併病心下鞭頸項強而眩者當刺大



椎肺俞肝俞慎勿下之雍曰仲景曰太陽病轉入少陽脈沈遲者與小柴胡湯龐氏曰脈緊者小柴胡湯少加牡蠣大抵少陽多宜和解故宜小柴胡湯太陽和解亦宜用之

又曰太陽少陽併病太陽病不解轉入少陽者脇下鞭滿乾嘔不能食往來寒熱尙未可吐下脈沈緊者與小柴胡湯龐氏曰脈緊者小柴胡加桂枝脇下鞭滿加牡蠣

又曰陽明少陽合病必下利其脈不負者順也負者



失也互相剋賊名爲負也雍曰宜理中湯下利而厥者宜四逆湯其脈不弦者爲順脈弦者陽明土負也急瀉邱墟陽陵泉以瀉少陽木急灸三里以補陽明土也

仲景曰三陽合病腹滿身重難以轉側口不仁面垢讖語下之則額上生汗手足厥冷若自汗出者白虎湯主之

又曰三陽合病脈浮大上關上但欲瞑睡日合則汗龐氏曰不言弦者隱於長大也常氏曰可桂枝柴胡



各半湯雍曰卽柴胡桂枝湯也

問曰仲景言本太陽病因醫下之腹滿時痛轉屬太陰者此爲兩感乎爲合病乎雍曰非也合病雖亦有轉屬者要之兩陽俱作也兩感則表裏陰陽俱病矣難經曰人之有尺猶木之有根枝葉雖枯槁根本將自生兩感則根葉皆將枯無自而生矣合病太陽太陰雖名一陰一陽而實非相爲表裏之經互相有生救謂如太陽雖病而少陰不受病太陰雖病而陽明不受病正類枝葉雖枯槁根本自生之象是以不爲



兩感況本非邪氣傳注醫誤下之移太陽之疾入於
太陰非兩經俱作之證甚明是以仲景用桂枝加芍
藥湯桂枝加大黃湯也

結胸二十二條

雍曰結胸痞氣陽毒陰毒狐惑百合六證雖有見於
前證中者而龐氏皆以其異證故別列於後今依龐
氏之法益以斑黃血衄證爲十證

仲景問曰病有結胸有藏結其狀何如曰按之痛寸
脈浮關脈沈名曰結胸龐氏曰寸口脈浮關上尺中



皆沈或沈緊

又曰何爲藏結答曰如結胸狀飲食如故時時下利寸脈浮關脈小細沈緊名曰藏結舌上白胎滑者難治常氏云可刺關元在臍下

又曰藏結無陽證不往來寒熱一云寒而不熱其人反靜舌

上胎滑者不可攻也常氏云可刺關元穴

又曰病人脇下素有痞連在臍旁痛引小腹入陰筋

者此名藏結死常氏云可刺大赫在腹部第二行

又曰病發於陽而反下之熱入因作結胸病發於陰



而反下之因作痞也所以成結胸者此下之太早故也朱氏曰傷寒本無結胸以其熱下之早熱氣乘虛而入痞結不散變成結胸王仲弓曰杜壬云傷寒在表誤下者宜急頻與理中湯丸更加人參多得解不作結胸若大腹轉損發厥者愚與四逆湯便安若胃中雖和而病不退候再有裏證再下之朱氏云以前來下湯未是故也

又曰若心下滿而鞭痛者此爲結胸也大陷胸湯主之但滿而不痛者此爲痞宜半夏瀉心湯



又曰結胸證其脈浮大者不可下下之則死朱氏云
尙宜發汗也脈浮是表證兼以小柴胡湯等先發表
表證罷後以結胸藥下之常氏云用巴豆黃連餅子
封臍中灸之卽諸方中所謂聖餅子灸法也

又曰結胸證悉具煩躁者亦死

又曰太陽病脈浮而動數浮則爲風數則爲熱動則
爲痛數則爲虛頭痛發熱微盜汗出而反惡寒者表
未解也醫反下之動數變遲膈內拒痛胃中空虛客
氣動膈短氣煩躁心中懊懣陽氣內陷心下因鞭則



爲結胸大陷胸湯主之雍曰此卽病發於陽而反下
之之證也若不結胸但頭汗出餘處無汗劑頸而還
小便不利身必發黃者可茵陳蒿湯雍曰若單服茵
陳濃汁調五苓散亦可

又曰傷寒六七日結胸熱實脈沈而緊心下痛按之
石鞭者大陷胸湯主之

又曰傷寒十餘日熱結在裏往來寒熱者與大柴胡
湯但結胸無大熱者此爲水結在胸膈也但頭微汗
出者大陷胸湯主之雍曰可下證中自但結胸下分



別爲二證故用二藥不同

又曰太陽病重發汗而復下之不大便五六日舌上

燥而渴日晡所小有潮熱

一云日晡所發心胸大煩

從心下至少

腹鞭滿而痛者大陷胸湯或以大陷胸丸下之

又曰小結胸證正在心下按之則痛脈浮滑者小陷

胸湯主之

又曰太陽病二三日不得臥但欲起心下必結脈微

弱者此本有寒分反下之若利止必作結胸未止者

四日復下之此作協熱利也常氏云脈微弱有寒者



可增損理中丸作結胸者大小陷胸湯協熱利者白頭翁湯

又曰太陽病下之後其脈數促一作縱不結胸者此為

欲解也脈浮者必結胸常氏云可增損理中丸脈緊者必咽痛

常氏云可桔梗甘草湯脈弦者必兩脇拘急常氏云可小柴胡湯脈細數

者頭痛未止常氏云可蔥鬚湯脈沈緊者必欲嘔常氏云可七物黃連

湯脈沈滑者協熱利常氏云可白頭翁湯脈浮滑者必下血常氏

云可檗皮湯

又曰病在陽應以汗解之反以冷水灌之濕之其熱



被劫不得去彌更益煩肉上粟起意欲飲水反不渴者服文蛤散若不差者與五苓散寒實結胸無熱證者與三物小陷胸湯白散亦可服龐氏云無熱證者與三物白散小陷胸湯非也愚以爲熱者小陷胸湯寒者三物白散

又曰結胸者項亦強如柔痙狀下之則和龐氏云宜服大陷胸湯

又曰太陽少陽併病而反下之成結胸心下鞭下利不止水漿不下其人心煩常氏云可半夏生薑二瀉



心湯

活人書云西晉崔行功云傷寒結胸欲絕心膈高起
手不得近大小陷胸皆不差者此是下後虛逆氣已
不理而毒復上攻氣毒相搏結於胸中當用枳實理
中丸先理其氣次療諸疾古今用之如神應手而愈
今常氏謂增損理中丸卽是也龐氏曰近世治結胸
多用鍼頭丸用硫黃陽起石者若病熱毒甚者必死
惟治冷結寒實耳

活人書云結胸三種有大結胸不按而痛胸連腹堅



鞭大陷胸湯主之有小結胸按之心下痛小陷胸湯
主之有水結胸在膈間亦名結胸小半夏加茯苓湯
小柴胡去棗加牡蠣湯主之又有寒熱二證有熱實
結胸者胸中煩躁心內懊懣舌上燥渴脈沈滑者皆
熱證也大陷胸湯主之有寒實結胸無熱證者三物
白散枳實理中丸主之

王仲弓曰治結胸當用小陷胸湯甚佳大陷胸湯太
峻如不得已則用大陷胸湯丸脈浮者不得用大陷
胸丸宜用小陷胸枳實理中丸結胸用黃連巴豆灸



法得解心下痞鞭宜旋覆代赭湯若外尙未解胸滿
脇痛者宜小柴胡湯雍曰凡用仲景藥皆當準此爲
式蓋今古不同病人血氣不能勝藥力醫工不能精
於診視非古人比故用藥可不及不可大過如脈浮
者尤宜從朱氏用發表藥表證罷以結胸藥治之

心下痞二十五條

仲景曰病發於陰而反下之因作痞也龐氏曰發熱
惡寒爲發於陽誤下則爲結胸無熱惡寒爲發於陰
誤下則爲痞朱氏曰傷寒本無痞因身冷醫反下之

遂成痞積實理中丸最良

又曰心下滿而鞭痛者爲結胸但滿而不痛名爲痞
宜半夏瀉心湯朱氏曰此湯藥蓋本理中又參黃芩
湯也審知是痞先用桔梗枳殼湯尤妙緣桔梗枳殼
行氣下膈故先之龐氏曰設使下後津液入裏胃虛
上逆寒結在心下故宜用辛甘發散之今用半夏以
下氣用苦以去溼兼通心氣又甘草力大使乾薑黃
連不能相惡此用半夏瀉心湯之意也

又曰脈浮而緊而復下之緊反入裏則作痞按之自



濡但氣痞耳常氏云可小陷胸湯生薑瀉心湯雍曰
宜半夏瀉心湯

又曰心下痞按之濡其脈關上浮者大黃黃連瀉心
湯主之龐氏曰寒溼迫心氣不行欲作熱也朱氏曰
結胸與痞關脈皆須沈若關浮則熱結故以三黃瀉
心也

又曰心下痞而復惡寒汗出者附子瀉心湯主之

黃連瀉心湯
內加附子

又曰本以下之故心下痞與瀉心湯痞不解其人渴



而口燥煩小便不利者五苓散主之一云忍之一日乃愈

又曰傷寒汗出解之後胃中不和心下痞鞭乾噫食

臭脇下有水氣腹中雷鳴下利者生薑瀉心湯主之

龐氏云胃中不和為少陽本氣所制故用生薑之辛

味也本字當作木字

又曰傷寒中風醫反下之其人下利日數十行穀不

化腹中雷鳴心下痞鞭而滿乾嘔心煩不得安醫見

心下痞謂病不盡復下之其痞益甚此非結熱但以

胃中虛客氣上逆故使鞭也甘草瀉心湯主之龐氏



云胃虛故加甘味
又曰傷寒服湯藥下利不止心下痞鞭服瀉心湯已
復以他藥下之利不止醫以理中與之利益甚理中
者理中焦此利在下焦赤石脂禹餘糧湯主之復利
不止當利其小便龐氏云五苓散主之

又曰傷寒大下後復發汗心下痞惡寒者表未解也
不可攻痞當先解表表解乃可攻痞解表宜桂枝湯
攻痞宜大黃黃連瀉心湯龐氏曰前加附子是汗出
多而惡寒表將解而裏結未除也此證是發汗無汗



而惡寒故先須解表也朱氏曰結胸與痞表未解者不可攻也

又曰傷寒發熱汗出不解心下痞鞭嘔吐而下利者大柴胡湯主之龐氏云汗出嘔吐下利是胃中津液燥裏有結實非胃虛也故大柴胡湯下之

又曰傷寒發汗若吐若下解後心下痞鞭噫氣不除者旋覆代赭石湯主之朱氏曰有旋覆代赭湯證其人或欬逆氣虛先服四逆湯胃寒先服理中丸次服此湯良



又曰太陽病外證未除而數下之遂協熱而利利下
不止心下痞鞭表裏不解者桂枝人參湯主之
又曰傷寒吐下後發汗虛寒脈甚微八九日心下痞
鞭脇下痛氣上衝咽喉眩冒經脈動惕者久而成痿
常氏云可服茯苓甘草白朮生薑湯振痿湯此湯未
見方恐是誤寫

又曰太陽中風下利嘔逆表解者乃可攻之其人熱
熱汗出發作有時頭痛心下痞鞭滿引脇下痛乾嘔
短氣汗出不惡寒者此表解裏未和也十棗湯主之



朱氏曰此湯尤難用須是表證罷身涼不惡寒者乃
可用若表未解者切不可用也雍曰十棗湯乃攻裏
大峻藥也非和裏藥也設或誤用殺人過於承氣常
氏言此證傳寫之誤故朱氏亦畏而戒之宜代用檳
榔散

又曰太陽病醫發汗遂發熱惡寒因復下之心下痞
表裏俱虛陰陽氣併竭無陽則陰獨復加燒鍼因胸
煩面色青黃膚暍者難治今色微黃手足溫者易愈
常氏云痞者可生薑瀉心湯發熱惡寒可小柴胡湯



火逆可桂枝去芍藥加蜀漆牡蠣龍骨救逆湯
又曰病如桂枝證頭不痛項不强寸脈微浮胸中痞
鞭氣上衝咽喉不得息者此爲胸有寒也當吐之宜
瓜蒂散

又曰太陽少陽併病心下鞭頸項强而眩者當刺大
椎肺俞肝俞慎勿下之雍曰其詳見併病中
又曰太陽病寸緩關浮尺弱其人發熱汗出復惡寒
不嘔吐但心下痞者此以醫下之也常氏云可生薑
半夏二瀉心湯雍曰此證汗出發熱惡寒表證不罷



宜先服柴胡桂枝湯次服枳實理中丸

又曰太陰之爲病腹滿而吐食不下自利益甚時腹
自痛若下之必心下結鞭常氏云可增損理中丸桂
枝加芍藥湯

又曰陽明病心下鞭滿者不可攻之攻之遂利不止
者死常氏云可半夏瀉心湯也已攻而利者四逆湯
又曰脈雙弦而遲者必心下鞭脈大而緊者陽中有
陰也可下之宜大承氣湯

活人書曰已痞服瀉心湯不愈然後可用陷胸湯下



之

又曰外證未解而心下妨悶者非痞也謂之支結柴
胡桂枝湯主之脇胸滿微結小柴胡加乾薑牡蠣湯
主之

王仲弓曰生薑瀉心半夏瀉心二湯和平宜常用之

仲景傷寒補亡論卷第十三終

